

# მწვანე ალტერნატივას კომენტარები და შენიშვნები

თეთრიწყაროს მუნიციპალიტეტში, სოფელ ქოსალარის მიმდებარე  
ტერიტორიაზე 835160 მ<sup>3</sup> ბაზალტის მოპოვების სკრინინგის  
განცხადებაზე

15 აპრილი, 2020

2020 წლის 7 აპრილს საქართველოს გარემოს დაცვისა და სოფლის მეურნეობის სამინისტროს ვებ-გვერდზე გამოქვეყნდა [განცხადება](#) თეთრიწყაროს მუნიციპალიტეტში, სოფელ ქოსალარის მიმდებარე ტერიტორიაზე 835160 მ<sup>3</sup> ბაზალტის მოპოვების პროექტის სკრინინგის განცხადებაზე გადაწყვეტილებისათვის ადმინისტრაციული წარმოების დაწყების თაობაზე.

მიგვაჩნია, პროექტი უნდა დაექვემდებაროს გარემოზე ზემოქმედების შეფასებას შემდეგი გარემოებების გამო:

1. კომენტარებისათვის გამოქვეყნებული წიაღის ეროვნული სააგენტოს სკრინინგის განცხადებაში არ არის წარმოდგენილი გარემოსდაცვითი შეფასების კოდექსის მე-7 მუხლის მე-4 ნაწილით<sup>1</sup> გათვალისწინებული ინფორმაცია. კერძოდ, არ არის მოცემული გადაწყვეტილების მიღებისათვის მთავარი მახასიათებლის - **შესაძლო ზემოქმედების ხასიათის შესახებ** ინფორმაცია.

სკრინინგის განცხადებაში მხოლოდ აღნიშნულია: „სალიცენზიო ობიექტი მდებარეობს ზღვის დონიდან 730-750 მ სიმაღლეზე, თეთრიწყაროს მუნიციპალიტეტში, სოფელ ქოსალარის მიმდებარე ტერიტორიაზე. საინჟინრო-გეოლოგიური პირობების სირთულის მიხედვით ობიექტის ტერიტორია მიეკუთვნება I (მარტივი) კატეგორიას. ობიექტი არ ხვდება სახელმწიფო ტყის ფონდის, დაცული ტერიტორიების, კულტურული მემკვიდრეობის ძეგლებთან სიახლოვეს, არც ტყით მჭიდროდ დაფარულ ტერიტორიაზე, სადაც გაბატონებულია წითელი ნუსხით დაფარული ხე-მცენარეები. რაც შეეხება საქმიანობის სხვა მახასიათებლებს (მაგ: ნარჩენების წარმოქმნა, ხმაურის დონე და ა.შ.), აღნიშნული დამოკიდებულია სამუშაოების წარმოების პროცესზე და წინასწარ არ ვფლობთ ინფორმაციას, თუ რა სახის ზემოქმედება შეიძლება მოახდინოს აღნიშნულმა საქმიანობამ გარემოზე“.

ვინაიდან, წიაღის ეროვნული სააგენტოს განმარტებით, ამ ეტაპზე მათთვის უცნობია ზემოქმედების ხასიათის შესახებ ინფორმაცია, მნიშვნელოვანია ჩატარდეს გარემოზე ზემოქმედების შეფასება, რომელიც სწორედ ამ ტიპის

<sup>1</sup> „4. საქმიანობის განმახორციელებლის მიერ სამინისტროსთვის წარდგენილი სკრინინგის განცხადება, საქართველოს ზოგადი ადმინისტრაციული კოდექსის 78-ე მუხლით გათვალისწინებული ინფორმაციის გარდა, უნდა მოიცავდეს:  
ა) მოკლე ინფორმაციას დაგეგმილი საქმიანობის შესახებ;  
ბ) ინფორმაციას დაგეგმილი საქმიანობის მახასიათებლების, განხორციელების ადგილისა და შესაძლო ზემოქმედების ხასიათის შესახებ“.

ინფორმაციის მოგროვებას, რისკების განსაზღვრას/შეფასებას და შესაბამისი შემარბილებელი ღონისძიებების დაგეგმვას ემსახურება.

2. საქმიანობის განხორციელების ადგილის შესახებ ინფორმაცია წარმოდგენილია ობიექტის კოორდინატებით, რაც დაინტერესებული საზოგადოებისათვის ნაკლებად ინფორმაციულია.

სკრინინგის განცხადებას ერთვის გეოსაინფორმაციო პაკეტი, რომელიც ასევე არ მოიცავს გარემოსდაცვითი შეფასების კოდექსის მე-7 მუხლის მე-4 ნაწილით გათვალისწინებულ ინფორმაციას. გეოსაინფორმაციო პაკეტით წარმოდგენილია „დაშორება მნიშვნელოვანი პუნქტიდან“ „მანძილი სახელმწიფო საზღვრიდან/სანაპირო ზოლიდან“; ხოლო უახლოესი დასახლებული პუნქტის გრაფაში მხოლოდ აღნიშნულია, რომ ეს არის სოფელი ქოსალარი. არ არის წარმოდგენილი ინფორმაცია დაგეგმილი საქმიანობის არეალიდან სახლების და/ან სხვა ტიპის ნაგებობების სიახლოვის და სოფლის სარგებლობაში არსებული საძოვრების და/ან სახნავ-სათესი მიწების სიახლოვის შესახებ.

3. გეოსაინფორმაციო პაკეტის თანახმად - გრაფა 12.5 „გეოლოგიური გართულებების შემთხვევაში გამაჯანსაღებელი ღონისძიებების დასახვა“- აღნიშნულია, რომ ობიექტის დამუშავების პროცესში მოხსნილი ნიადაგის არსებული ფენა და ფუჭი ქანი უნდა დასაწყობდეს ტერიტორიის შემდგომი რეკულტივაციის მიზნით. ამასთანავე, არაფერია აღნიშნული ამ ღონისძიებისათვის საჭირო ტერიტორიისა და შესაძლო ზემოქმედების შესახებ.

4. გეოსაინფორმაციო პაკეტის თანახმად, გეოლოგიური ინფორმაციის წყაროდ გამოყენებულია 1984 წელს მომზადებული გეოლოგიური ანგარიში - **რაც ადასტურებს საკითხის სრულფასოვნად შესწავლის საჭიროებას.**

5. არ არის წარმოდგენილი მნიშვნელოვანი ინფორმაციის ნაწილი, რომელის საფუძველზეც გარემოსდაცვითი შეფასების კოდექსის მე-7 მუხლის მე-6 პუნქტის თანახმად, სამინისტრომ უნდა მიიღოს გადაწყვეტილებას იმის თაობაზე, ექვემდებარება თუ არა დაგეგმილი საქმიანობა გზშ-ს. კერძოდ არ არის წარმოდგენილი:

ა) საქმიანობის მახასიათებლები:

- ა.ბ) არსებულ საქმიანობასთან ან/და დაგეგმილ საქმიანობასთან კუმულაციური ზემოქმედება;
- ა.გ) ბუნებრივი რესურსების (განსაკუთრებით – წყლის, ნიადაგის, მიწის, ბიომრავალფეროვნების) გამოყენება;
- ა.დ) ნარჩენების წარმოქმნა;
- ა.ე) გარემოს დაბინძურება და ხმაური;
- ა.ვ) საქმიანობასთან დაკავშირებული მასშტაბური ავარიის ან/და კატასტროფის რისკი;

ბ) დაგეგმილი საქმიანობის განხორციელების ადგილი და მისი თავსებადობა:

- ბ.ე) მჭიდროდ დასახლებულ ტერიტორიასთან;
- ბ.ვ) კულტურული მემკვიდრეობის ძეგლთან და სხვა ობიექტთან;

გ) საქმიანობის შესაძლო ზემოქმედების ხასიათი:

- გ.ა) ზემოქმედების ტრანსსასაზღვრო ხასიათი;
- გ.ბ) ზემოქმედების შესაძლო ხარისხი და კომპლექსურობა.